

आकाशवाणी

खास-खास खबरां

1. इजरायल ते अमरीका नै ईरान पर केई हमले कीते न- अमरीका नै आखेआ ऐ जे अमरीकी फौज अपने राश्ट्रीय सुरक्षा हितें लेई खतरें गी रोकने लेई बड्डे पैमाने पर अभियान चला करदी ऐ।
2. भारत नै इजरायल- कुबैत ते इजरायल च रौहने आहलें अपने नागरिकें लेई दिशा-निर्देश ते सलाह जारी कीती ऐ।
3. प्रधानमंत्री नरेन्द्र मोदी होरें अज्ज सरवाईकल केंसर खलाफ राश्ट्रव्यापी अभियान HPV दी शुरुआत कीती- राजस्थान दे अजमेर च 16 ज्हार करोड़ रपे दियें परियोजनाएं दी शुरुआत कीती।
4. डी.आर.डी.ओ नै ओडिशा दे समुन्द्री तट पर Short Range Air Defence System दे त्रै कामयाब परीक्षण कीते।
5. आई.सी.सी.- टी-20 विश्व कप च एल्लै पाकिस्तान ते श्रीलंका बश्कार मकाबला जारी ऐ।

<><><><><><>

Israel -US Attack Iran

इजरायल ते अमरीका नै अज्ज ईरान पर हमलें कीते ना। इजरायल दी सेना नै इक ब्यान जारी करदे होई आखेआ ऐ जे ओ पच्छमी ईरान दे ईरानी शासन कन्नै जुडे दे केई फौजी ठिकाने पर बड्डे पैमाने पर हमलें करा करदी ऐ। राजधानी तहरान सनें ईरान दे केई शैहरें च जबरदस्त धमाकें होने दी बी खबर ऐ। अमरीका दे राश्ट्रपति डोनाल्ड ट्रम्प नै सोशल मीडिया पर पोस्ट कीते गेदे अपने 8 मिनटें दे वीडियो च इस गल्लै दी तस्दीक कीती ऐ जे अमरीका नै ईरान च अपना फौजी अभियान शुरु करी दिता ऐ। उ'नें आखेया जे अमरीकी फौज मौजूदी ईरानी शासन गी अमरीका ते ओहदे राश्ट्रीय सुरक्षा हितें लेई खतरा बनने शा रोकने लेई उप्परोतली ते बड्डे पैमाने पर अभियान चला करदी ऐ। उ'नें आखेआ जे इस हमले दा मकसद ईरानी शासन कोला पैदा होने आलें खतरें गी खत्म करियै अमरीका दी जनता दी रक्षा करना ऐ। उ'नें आखेया जे ईरान दी खतरनाक गतिविधियां सिद्धे-सिद्धे अमरीका-ओहदे सैनिकें- विदेशें च स्थित ठिकानें ते सहयोगियें लेई बड्डा खतरा ना। इजरायल दे रक्षा मंत्री इजरायल काट्ज नै आखेआ जे उन्दे देश नै ईरान खिलाफ सोची-समझी योजना तैहत हमला शुरु कीता ऐ ते पूरे मुल्ले च एमरजेन्सी दी घोषणा बी करी दिती ऐ। ए हमलें संभावित परमाणु समझौते गी लेइयै अमरीका ते ईरान बश्कार बदधी तनोतनी ते पच्छिम एशिया च व्यापक फौजी टकराव दियें शेंकाएं दे चलदे कीते गे ना। हमले दे बाद ईरान नै अपना हवाई क्षेत्र बंद करी दिता ऐ ते मोबाईल फोन सेवा पर बी असर पेया ऐ। तोंआई गोआंडी मुल्ले ईरान पर इजरायली हमले दे बाद ईराक नै अपना हवाई क्षेत्र बंद करी दिता ऐ। इनें हमलें दे परते च ईरान नै अबुधाबी- बेहरीन ते कुबैत सनें खाड़ी दे केई ठिकाने पर हमले कीते ना।

<><><><><><>

India Israel Advisory

इजरायल स्थित भारतीय दूतावास नै इलाके च मौजूदा हालात गी दिक्खदे होई इजरायल च रौहने आलें सबनें भारतीय नागरिकें गी सौहगा सतर्क रौहने ते एहतियात बरतने दी सलाह जारी कीती ऐ। इस सलाह च भारतीय नागरिकें गी आखेआ गया ऐ जे ओ जारी दिशा-निर्देशों दी पूरी संजीदगी कन्नै पालमा करना। भारतीय नागरिकें गी खबरें ते इजरायल सरकार दियें घोषणाएं पर तक्क रक्खने लेई बी आखेआ ऐ। भारतीय दूतावास नै दसेया ऐ जे कुसै आपात स्थिति च भारतीय नागरिक दूतावास दे हैल्पलाईन नम्बर- 972547520711 पर सम्पर्क करी सकदे न जां cons1.telaviv@mea.gov.in पर ई-मेल भेजी सकदे ना।

<><><><><><>

India Kuwait Advisory

कुबैत स्थित भारतीय दूतावास नै इलाके च मौजूदा हालात गी दिक्खदे होई कुबैत च रौहने आलें सबनें भारतीय नागरिकें गी सौहगा सतर्क रौहने ते एहतियात बरतने दी सलाह जारी कीती ऐ। इस सलाह च भारतीय नागरिकें गी आखेआ गया ऐ जे ओ जारी दिशा-निर्देशों दी पूरी संजीदगी कन्नै पालमा करना। भारतीय नागरिकें गी खबरें ते कुबैत सरकार दियें घोषणाएं पर तक्क रक्खने लेई बी आखेआ ऐ। भारतीय दूतावास नै दसेया ऐ जे कुसै आपात स्थिति च भारतीय नागरिक दूतावास दे हैल्पलाईन नम्बर- 96565501946 पर सम्पर्क करी सकदे न जां

Communitykuwait@mea.gov.in पर ई-मेल भेजी सकदे ना जारी सलाह मताबक दूतावास सामान्य रूप कन्नै अपना कम्म करा करदा ऐ।

<><><><><><>

America- Israel

ईरान पर अमरीका ते इजरायल ते उप्परोतली हमले दे चलदे एयर फ्रांस- एयर इंडिया- ब्रिटिश एयरवेस- इबेरिया एक्सप्रेस- इंडिगो- जापान एयर लाईन्स- लाट पोलिश एयर लाईंस- लुफथानसा- नारवेजियन एयर शटल- तुर्की एयर लाईन्स- वर्जिन एटलांटिक- कतर एयरवेज- एयर एलजिरिया- स्कैन्डी नेवियन एयरलाईस ते विज़ एयर सनें केई प्रमुख हवाई सेवा कम्पनिये इस इलाके अपनी सबै डोआरियां रद्द करी दितियां ना।

<><><><><><>

EU Statement

यूरोपीय संघ दे विदेश नीति सरबन्धी प्रमुख काज़ा कल्लास होरे मध्य पूर्व दे मौजूदा हालात ते ताजा घटनाक्रम गी बड़ा खतरनाक दस्सदे होई नागरिके दी सुरक्षा ते अंतराष्ट्रीय कनूनें दी सख्ती नै पालमा दा आह्वान कीता ऐ। कल्लास होरे आखेआ जे उनें इजरायल दे विदेश मंत्री गिदोन सार हुंदे कन्नै गल्लबात कीती ऐ ते लड़ाई दे खतरे गी टालने लेई राजनयिक रस्ता अपनाने लेई अरब सांझेदारें कन्नै बी गल्लबात चला करदी ऐ। काज़ा कल्लास होरे अगगे आखेआ जे गैर-जरूरी कर्मचारिये गी उत्थुआं वापस सद्ने दे कन्नै गै यूरोपीय संघ दा दूतावास अपने नागरिके दी वापसी लेई कोशिशं करा करदा ऐ।

<><><><><><>

PM -HPV

प्रधानमंत्री नरेन्द्र मोदी होरे अज्ज अजमेर च 14बरे दिये उम्री दी बच्चिये लेई सरवाईकल कैंसर खिलाफ राष्ट्र व्यापी ह्यूमन पैपिलोमा वायरस HPV टीकाकरण अभियान दी शुरुआत कीती। इस पैहल दा मकसद सरवाईकल कैंसर दी रोकथाम करना ऐ जेडी महिलाएं च कैंसर दे प्रमुख कारणे चा इक ऐ। अभियान दी शुरुआत 5 बच्चिये गी HPV दा टीका लाइयै कीती गेई। प्रधानमंत्री होरे 16 ज्हार करोड़ रुपे कोला मती लागत आलिये बक्ख-बक्ख परियोजनाएं चा केइये दा उदघाटन कीता ते केइये दी नींह पत्थर रक्खेया। मोदी होरे राजस्थान दे बक्ख-बक्ख मैहकमे च नमे लाए गेदे 21 ज्हार कोला मते नौजवाने गी नियुक्ति पत्र बी सौंपे। इस मौके प्रधानमंत्री होरे आखेआ जे बी.जे.पी सरकार नै म्हेशा महिलाये दी लौहकी कोला लौहकी समस्याएं दे नबेडे गी तरजीह दिती ऐ। उनें आखेआ जे HPV टीकाकरण अभियान इस्सै भेठा इक होर महत्वपूर्ण गैऽ ऐ। उनें गलाया जे ए अभियान देसै दी नारी शक्ति गी सशक्त बनाने दी दिशा च बी इक महत्वपूर्ण कदम ऐ। मोदी होरे आखेआ जे महिला हर घरै दी रीढ हुंदियां न ते 2014 सवां बी.जे.पी सरकार नै महिलाये गी सशक्त करने आस्तै केई योजना शुरु कीतियां ना। उनें आखेआ जे स्हाडी सरकार सत्ता दे अंहकार च नेई सगुआ संवेदनशीलता कन्नै कम्म करदी ऐ। पिच्छले दिनें नमीं दिल्ली च आयोजित AI Impact शिखर सम्मेलन च कांग्रेस दे असभ्य व्यवहार ते विरोध-प्रदर्शन दा हवाला दिंदे होई उनें आखेआ जे पूरे देश गी इस इन्ने बड्डे आयोजन पर गर्व महसूस होआ करदा हा- पर चुनावे च उप्परोतली हार दा सामना होने कारण बतोई दी ते निराश कांग्रेस नै अंतराष्ट्रीय परौहने दे सामने देश गी बदनाम करने दी कोशिश कीती। भारतीय हथियारबंद बले दी सराहना करदे होई प्रधानमंत्री होरे आखेआ जे ए बल हर मोर्चे पर कामयाब होइयै देशै दी रक्षा करदे न ते मान बधां दे न- पर कांग्रेस नै रक्षाबले दी काबलियत ते भरोसे पर गै सोआल पुट्टी टकाए न ते इस्सै करियै भारत दे लोक हर चुनां च कांग्रेस गी अपने स्हाबै परता देआ करदे ना।

<><><><><><>

HPV Drive

राष्ट्रव्यापी ह्यूमन पैपिलोमा वायरस जिसे HPV वैक्सीनेशन दे नां कन्नै जानेया जा'रदा ऐ- आहला अभियान जम्मू प्रांते दे सबनें जिले च बी शुरु होई गेआ ऐ। इस पैहल दा मकसद किशोर उम्री दिये बच्चिये गी एहकड़ा टीका लाइयै उनेंगी सरवाईकल कैंसर ते HPV- सरबन्धी बमारिये कोला सुरक्षा प्रदान करना ऐ। उधमपुर जिले च टीकाकरण अभियान दा औपचारिक तौरा पर उदघाटन सरकारी मैडिकल कालेज च जिला विकास कमीशनर सिंगा शेरपा होरे कीता। तोंआई पुंछ च एहदी शुरुआत ADC ताहिर मुस्तफा मलिक होरे राजा सुखदेव सिंह अस्पतालै च कीती।

<><><><><><>

PM -Youth Powerman

प्रधानमंत्री नरेन्द्र मोदी होंरें राश्ट्रीय विकास ते कुल संसारी हित लेई नौजवानें गी सशक्त बनाने- शोध ते अनुसंधान लेई बनकदा माहौल ते तंत्र उपलब्ध करोआने ते विज्ञान ते प्रोद्योगिकी दा पूरा-पूरा इस्तेमाल करने दे धेइयें गी पक्का कीता ऐ। राश्ट्रीय विज्ञान दिवस दे मौके पर अपने सनेह च मोदी होंरें आखेया जे लोक नमाचार-शोध अनुसंधान ते साईसी जानकारी हासल करने दी तांग दा जश्र मना करदे न- जेडी राश्ट्र गी अगडे लेई जाने दी इक मजबूत सारत ऐ। उ'नें आखेआ जे ए ध्याडा भारत दे महान साईसदान सी.वी. रमन इफेक्ट हुंदे आसेआ रमन इफेक्ट दी खोज दा चेता नोआंदा ऐ- जिन्नै भारतीय अनुसंधान गी दुनिया दे नक्शे पर इक टकोहदी पंछान दोआई।

<><><><><><>

PM- Gujrat Visit

प्रधानमंत्री नरेन्द्र मोदी होंरें बी अज्ज दपैहरी गुजरात दा दौरा लाया। प्रधानमंत्री होंरें अपने इस दौरे दरान सबंद च Micro Semiconductor Technology India Private Ltd. दी Semiconductor Assembly-Test ते Packaging सुविधा दा उदघाटन कीता। एह उदघाटन भारत दी Semiconductor निर्माण यात्रा च इक मता महत्व आहला मील दा पत्थर ऐ- जिसदे कन्नै सनंद ATMP सुविधा थमां पैहले Made in India Semiconductor Memory Modules दा व्यवसायिक उत्पादन ते शिपमेंट शुरु गई ऐ। इस मौके उप्पर सभा गी सम्बोधित करदे होई श्री मोदी होंरें आखेआ जे भारत च आयोजत भारत ए.आई. इम्पैक्ट समिट नै अपनी ए.आई क्षमता गी दुनिया गी पेश कीता ऐ। इस मौके उप्पर बोलदे होई केन्द्री Electronics ते Information Technology मंत्री Ashwini Vaishnav होंरें आखेआ जे Semiconductor उद्योग जेकर बुनियादी उद्योग ते भारत ने वैश्विक नक्शे उप्पर अपनी स्थिति स्थापत कीती ऐ।

<><><><><><>

DRDO -VSHORADS

डी.आर.डी.ओ नै ओडिशा दे समुन्द्री तट पर Integrated Test Range Chandipur थमां Very Short Range Air Defence System दे लगातार त्रै सफल उडान परीक्षण कीते। रक्षा मंत्रालय नै आखेआ ऐ जे एह परिक्षण बक्ख-बक्ख रफतार रेंज ते ऊंचाई उप्पर रफतार आहले खतरे गी बेअसर करने च एह मिसाईल सिस्टम दी क्षमता गी दुबारा प्रमाणित करने लेई कीता गेआ ऐ। Telemetry Electro-Optical Tracking System जनेह बक्ख-बक्ख रेंज दे उपकरणें कन्नै लैते गेदे उडानें दे आंकडे नै हवाई खतरें दी व्यापक श्रृंखला दे खलाफ VSHORADS दी प्रभावशीलता गी प्रमाणित कीता ऐ।

<><><><><><>

T-20 WC

मर्दे दे आई.सी.सी. टी-20 विश्व कप दे सुपर -8 ग्रुप दो दे इक मैच च एल्लै पाकिस्तान ते श्रीलंका बश्कार मकाबला चलै करदा ऐ ते पैहले बल्लेबाजी करदे होई पाकिस्तान दी टीम नै 5 ओवरें च 0 विकेट दे नुक्सान पर 51 रन्ज बनाई लैते देना। एहदे शा पैहले श्रीलंका नै टॉस जित्तियै पैहले गेंदबाजी करने दा फैसला लैता। एह मैच पल्लेकल अंतराश्ट्रीय स्टेडियम पल्लेकल च खेडया जा'रदा ऐ। तोंआई जंदी रातीं कोलम्बो दे आर.प्रेमदासा स्टेडियम च सुपर-8 ग्रुप-दो दे इक मैच च इंग्लैंड नै न्यूजीलैंड गी 4 विकेटें कन्नै रहाया ते ओहदे शा पैहले वीरवारें चिन्नेई च भारत नै जिम्बाब्वे गी 72 रन्जे कन्नै रहाया हा।

<><><><><><>

Ranji Final

जम्मू-कश्मीर क्रिकेट टीम नै अज्ज कर्नाटक खलाफ फाइनल मैच ड्रा खेडढने दे बाद पैहली पारी दी बढत दे आधार पर अपना पैहला-पैहला रणजी ट्रॉफी खिताब जित्तियै इतिहास रची दिता ऐ। कल्लै दा खेड्ड मुक्कने तोडी जम्मू-कश्मीर नै कुल 4 सौ सत्तर रन्जें दी बढत बनाई लैती ही। दुई पारी च 4 विकेटे दे नुक्सान पर इक सौ छयासी रन्जे कोला अज्ज अगगे खेड्डे होई अज्ज कामरान इकबाल ते साहिल लोत्रा दवै खडढारियें अपने-अपने शतक पूरे करदे होई कर्नाटक खलाफ कुल 6 सौ तेती रन्जें दी बढत हासल करी लैती दिती ही- जिस्सलै दवै कप्तान मैच खत्म

करने पर राजी होई गे- उसलै जम्मू-कश्मीर नै 4 विकेटें दे नुक्सान पर 3 सौ बताली रन्ज बनाई लेदे हे। जम्मू-कश्मीर दी टीम गी रणजी ट्रॉफी च ऐतिहासिक जित्त हासल करने पर मुबारकबाद दिंदे होई मुख्मन्त्री उमर अब्दुल्ला होरें खड्डारियें ते सहयोगी अमले गी नकद 2 करोड़ रपे ईनाम देने दी घोषणा कीती।

<><><><><><>

Victory Celebration

तोंआई जम्मू-कश्मीर दी इस ऐतिहासिक जित्त दा जश्न मनांदे होई पूरे जम्मू-कश्मीर च अज्ज खुशी ते उत्साह दी लैहर द्रौडी पेई। स्कूली बच्चें ते नौजवानें जम्मू-कश्मीर क्रिकेट एसोसिएशन दे दफ्तर च किट्टे होइयै इस ऐतिहासिक उपलब्धि दा जश्न मनाया। इन्ना गै नेंई लोकें ढोल बजांदे होई नाच-गाना कीता ते इक-दुए गी मठाइयां बी बंडिया। आकाशवाणी समाचार कन्नै गल्ल करदे होई क्रिकेट प्रेमियें आखेआ जे अज्जै दा ध्याड़ा जम्मू-कश्मीर दे इतिहास च सैहरे अक्खरे च लिखआ जाहग- कीजे जम्मू-कश्मीर दी टीम आसेया दर्ज कीती गेदी इस चाल्ली दी पैहली बड्डी जित्त ऐ। तोंआई उपराज्यपाल मनोज सिन्हा- मुख्मन्त्री उमर अब्दुल्ला-उपमुख्मन्त्री सुरिन्दर चौधरी- मन्त्री सतीश शर्मा ते स्कीना इत्तू सनें अंतराष्ट्रीय क्रिकेट परिषद दे अध्यक्ष Jay शाह होरें जम्मू-कश्मीर दी टीम गी रणजी ट्रॉफी च ऐतिहासिक जित्त हासल करने पर मुबारकबाद दिती ऐ।

<><><><><><>

Brazil –Death Toll

ब्राजील दे दक्खनपूर्वी प्रांत मिनास गेराइस च भारी बरखें कारण मरोने आहलें दी गिनतरी बधियै 68 तगर पुज्जी गेई ऐ। ताजा जानकारी मुजब केंई लोक अजें बी लापता न ते तुपाई राहत ते बचाव कारवाई अजें जारी ऐ ते बरखा कारण ढेई पेदे मकानें दे मलबे हेठा जिन्दा लोकें गी बाहर कड्डुने दियां कोशशां बरोबर जारी ना।

<><><><><><>

Publication - Voter List WB

पच्छिम बंगाल च अदे-दुब्बे पर त्यार खीरी मतदाता सूचि दा प्रकाशन शुरु होई गेआ ऐ। ऑनलाईन प्रकाशित होने कोला पैहले सूचि गी बूथ स्तह दे अधिकारियें राएं लोकें कन्नै सांझा कीता जाई चुके दा ऐ। बक्ख-बक्ख जिलें च मतदाताएं दे नाएं दियां सूचना लाइयां जा'रदियां ना। निर्वाचन आयोग नै भरोसा दोआया ऐ जे ए लिस्ट बडी तौले वैबसाईट उप्पर उपलब्ध होग। बांकुरा ते कूच बिहार सनें केंई जिलें च मतदाता सूचियें च कॉपी लाई जाई चुकी दी ऐ।

<><><><><><>